

## 2 Pedro

**1** Høøch xøhajt Simón Pedro. Høøch hädaa nocy njahby. Ja'a Jesucristøch nmøødtuumby. Jaayá'ayhøch tøø xwiinguexy cooçhä miädia'agy nyajwá'xät. Tøø mijtsä Jesucristo xyajnähdijy coo hajxy hoy mmäbøgät jaduñ mäuwiin neby højts xyajnähdijjään. Tu'cuhdujt hajxy jaduñ xquiumáayyäm nägøxiä je'leguiøxpä coo hajxy tu'cuhdujt nmäbøjcäm coo tiøyyä. Jaduñ yajnajuø'øy coo Jesucristo yhojiäya'ayä. Jaaya'ay hajxy nDioshåjtäm. Tøø hajxy xpiädáacäm hawa'adstuum. <sup>2</sup>Ween mijtsä Dios ja'a hoyhajtä weenhajt xmio'oy mõj may coo ja'a tøyhajt hajxy mmøødä ja'a Diosøxpä møødä Jesucristocøxpä, ja'a hajxy nWiindsønåjtämbä.

<sup>3</sup>Coo ja'a tøyhajt hajxy nmøødhåjtäm ja'a Jesucristocøxpä, paadiä Dios hajxy madiu'u xpiuhbëjtäm ja'a miäjaahaam, jaduñ hajxy hoy njäya'ayhåjtämät. Mänitä Dios hajxy jaduñ xquiumáayyämät. Jaanä miäjaahaamä Dios hajxy xyagjugyhadäänäm homiänaajä neby je'e jjugyhatiän. Coo Jesucristo miøjjä jiaançhä, coo jiaanç tehñ yhojiäya'ayä, paady

hajxy tøø xyajnähdijjäm coo hajxy hoy njäya'ayhåjtämbät. <sup>4</sup>Coo Jesucristo jaduñ miøjjä jiaançhä, paadiä mayhajt mõj may tiuna'añ maa højtscøxphåjtäm. Jaduñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphåjtäm. Homiänaajä hajxy xyagjugyhadäänäm neby je'e jjugyhatiän. Y tøø hojiootä howyiinmahñdy hajxy xmióoyyäm hawiinjemybiä. Jaduñ hajxy hoy nmøødhåjtämät tu'ugmädia'agy. Jaduñä haxøøgpä hajxy yaa hoy njøjyohdiúutämät hädaa yaabä naaxwiin. Ja'a häna'c-hajxy yaa ca'a mäbøjpä, hadsojwiinmahñdy hajxy miøød. Coo yhaxøøgwiinmahñdy hajxy jaduñ quia'a najtshixø'øwa'añ, paady hajxy jiiby quia'awa'añ haxøøgtuum. <sup>5-7</sup>Paadiä Diosmädia'agy hajxy tsøc mäbøjcäm. Tsøc hajxy hojiäya'ayhåjtäm hamuumdu'joot. Tsøc hajxy jaac habøjcäm ja'a Diosøxpä. Tsøc hajxy håjtäm najuø'øyhaamby. Tsøc hajxy mee'xtújcäm. Tsøgä Dios hajxy wiingudsähgøøyyäm. Tsøc hajxy niçhöjcäm nebiä tu'ugpuhya'ayän, neby højtsä Jesucristo xchøjcäm.

Tsögä jäya'ay hajxy nägøxiä tsojc mee'xäm, hoy hajxy näje'e quia'a jagä mabøcy.

<sup>8</sup>Coo hajxy jaduñ hamuumdu'joot ngudiúunämät nébiøch naamnä tøø nmädia'agy, mänit hajxy nhoyøøyyämät. Mänitä Jesucristo tiuung hoy ndúunämät. Nmøødhájtämä tøyhajt hajxy jaduñ ja'a Jesucristocøxpä. <sup>9</sup>Hix, pønjaty jaduñ ca'a cudiuumb nébiøch naamnä tøø nmädia'agy, jaduñ mäwíinäts hajxy je'e nebiä wiinds nebiä xoodspän je'eguiøxpä coo hajxy tøø jahdiägoy coo piojpä quiädieey hajxy tøø nähwa'ačhii neby hajxy hijty jegyhajty jiäya'ayhatiän. Jaduñ hajxy tøø jahdiägoobiä coo Dios joot chocy coo hajxy hoy jiäya'ayhádät. Paady hajxy jaduñ jia yajnáhwaatsä.

<sup>10</sup>Hoorä, mägu'ughajpádøjc, tsøc hajxy hamuumdu'joot cudiuunäm nébiøch naamnä tøø nmädia'agy. Jaduñ yajnajuø'owa'añ coo Dios hajxy tøø xyajnáhdíjjäm coo hajxy xquiu'ughadäänäm. Coo hajxy jaduñ ngudiúunämät, cab hajxy jaduñ mänaa ndu'udägóoyyämät.

<sup>11</sup>Jaduñ hajxy hoy yajxonñ nnøcxämät Jesucristo wyiinduum maa cøjxta'axiøø yhane'emian. Jaaya'ay hajxy nWiindsønhájtäm. Tøø hajxy jaduñ xyajnáhwáatsäm.

<sup>12</sup>Homiänájäts mijts jaduñ nyagjahmiejtsta'aga'añ nébiøch naamnä tøø nmädia'aguiän. Tøyhájtøch jaduñ tøø nmädia'agy. Hoy hajxy jaduñ mjaty. Cab hajxy mdsoj jahdiägoyya'añ.

<sup>13</sup>Hawiinmats jaduñ cooçh mijts jaduñ nyagjahmiejtstá'agät tehngajnä, mädúhñtiøch njaac

jugyhaty. <sup>14</sup>Hamdsóojøchä Jesucristo xñämaayy cóogøch mobädajpä nho'ogaannä, ja'a hajxy nWiindsønhájtämbä. <sup>15</sup>Pero cooçh hánajty tøø nho'ogy, hoy hajxy jaduñ mjaac capxtá'agät nébiøch cham nmädia'aguiän. Jaduñ hajxy hoy mjahmiejtstá'agät.

<sup>16</sup>Tøø højts mijts nyajwiingapxø'øyc coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduñ nmädiaacy. Cab højts hamdsoo nyajcojy. Diosmädia'agy hädaa jaduñ. Ca'a nälä cueentä nebiä jäya'ay cueentä hajxy yajcojjiän. Hamdsoo højtsä Jesucristo nhijxy coo møcmäjaa miøødä, coo je'e Dyiosä. <sup>17-18</sup>Mänaa højtsä Jesucristo hánajty jim nmøødän maa tunän, mänitä Diosteedy jim quiuhgapxnajxy tsajpootyp: “Høøçh nhamdsoo Huung yø'ø. Njaanç tehñ chójpiøch yø'ø. Jaanç tehñ jiootcújc-høch nnijwiø'øwyii maaçh nHuungcøxpän”, nømä Jesucristo nänøømä. Njaanç mädoow højts jaduñ. Møcmäjaahaamä Dios jaduñ quiapxy. Jaanç tehñ yajxonä Jesucristo piädaacä ja'a Tiéediäm, nebiä hajjpan. Paady højts yø'ø tun nyajxøøbejty: “Ja'a tun maa Dios nägapxiän coogä Jesucristo yHuunghaty.”

<sup>19</sup>Tøyhajt jaduñ jiaanç jajty nébiøch cham nmädia'aguiän. Hamdsoo højts nhijxy nmädooyy. Hahixøøby jaduñ coo højts mijts nmädia'agy xmiäböjcat. Maas hahixøøby jaduñ coo Diosmädia'agy hajxy mmäböjpat, ja'a jäya'ayhajxy jecy

quiujáhyäbä. Jaduhñ mäwíinädsä Diosmädia'agy miäbaady nebiä jøon tioyyän hagoonstuum. Hix, xyajwiinjuóøyyäm hajxy jaduhñ tijaty hajxy hoy hamdsoo nga'a wiinjuø'owáanäm. Hahixøøby jaduhñ coo hajxy homiänaajä nyajcopcøøyyämät. Coo Jesucristo yaa quiädaactägätsät hädaa yaabä naaxwiin, mänit hajxy cøxiä xyajwiinmädiaagø'owáanäm. Jaduhñ hajxy hoy nwiinjuø'owáanäm cøxiä.

<sup>20-21</sup> Huuc wiinjuø'ow hajxy jaduhñ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhñ quiujahy tijaty hänäjty jadaänäp tunäänäp. Ja'a Dios je'e najtscapxøøyy ja'a yhEspirituhaam waamb hajxy quiujáayät.

**2** Jii jäya'ayhajxy hijty näje'e jegyhajty miäna'añ cooc tyijy Dios hajxy hänäjty ñajtscapxøøyyäbä. Pero hønndaacp hajxy hänäjty jaduhñ. Ja'a Dioscu'ug hajxy hänäjty jia wi'i wyiinhøønaamby. Jaanä jaduhñä hønndaacpähajxy jiiby wiäditaambä maa mgajpthajxiän. Cabä cu'ug ñajuø'owa'añ pø wiinhøñäp hajxy hänäjty jaduhñ. Høxtä mäna'anaambä hønndaacpähajxy jaduhñ cooc tyijy ja'a Jesucristo hajxy tøø xquia'a nähho'túutäm. Paquiä hajxy yajcumädowa'añii. Pønjatiä hønnda'agymiädia'agy mabøgaamb, tu'udägoyyaamb hajxy jaduhñ. Ja'a häna'c-hajxy jaduhñ hønndaacpä, niyhamigähadäänäp hajxy jaduhñ. <sup>2</sup> Pahixäänäp hajxy jaduhñ nämay. Ja'a häna'c-hajxy mabahixaamb, ja'a tyijy ja'a

Diosmädia'agy hajxy mabøjpä. Coo hajxy jaduhñ hoy quia'a hida'añ, ni häna'c-hajxy hønndaacpä, ni häna'c-hajxy mabahixpä, paadiä cu'ugä tøyhajt hajxy quia'a tsoga'añ ja'a Jesucristocøxpä.

<sup>3</sup> Ja'a hønndaacpähajxy, xädø'øñ hajxy piøcjuø'owaamby. Hønnda'agymiädia'agyhaamby mijts xyajnähixø'owa'añ; jaduhñä xädø'øñ hajxy xjia wi'i piøgaanä. Jéquiänä Dios tiägøøyy mänaandaacpä coogä häna'c-hajxy quiumädowa'añ, ja'a hønnda'agymiädia'agy hajxy yajnähixøøbiä. Jaduhñä Dios jecy miänaandaacpä cooc hajxy quiuhdägoyya'añ.

<sup>4</sup> Hix, yajcumädoobiä Dios je'e pønjaty ca'a mabøgaamb. Coo mioonsähajxy näje'e jim jecy quia'a mabøjcy tsajpootyp, paady hajxy jecy quiumädooyy. Haxøøgtuum hajxy hoy quiuhjuipnaxyii maa jiaanč tehñ quiøöcän, maa yhagoonstuumän. Jim hajxy yhida'añ høxtä coonä yhabaadät coo Dios jaduhñ miäná'anät nebiaty hajxy jii jiaac tsaächtiuna'añii. <sup>5</sup> Jaanä jaduhñä Dios ja'a jecyjiäya'ay yajcumädoobä, ja'a hajxy jecy tøø quia'a mabøquiäbä. Mänitä Dios nøøgomdägoy quiejxy. Jayooyyä Noéhajxy choocy møødä yhuung møødä tio'oxy ja'a näductujcäp. Jaduhñä Noé ja'a cu'ug hänäjty tøø jia yajwiingapxø'øy coogä yhaxøøgcuhdujt hajxy ñajtshixø'owät, coogä Dios hajxy wyiingudsähgø'owät. <sup>6</sup> Jaanä jaduhñä jecyjiäya'ayhajxy jiajpä, ja'a hajxy hijty jim tsänaabiä

maa cajpt hijty jaduñ xiõhatiän Sodoma mõõdä Gomorra. Cabä Dios hajxy hijty ñä'ägä wiingudsähgø'øy. Paady hajxy jøønhaam yajcuhdägooyä. Cøjxä haxøøghäna'c-hajxy yho'ogy. Haagä cujiaam hajxy jiajnä mõõdä quiajphajxy. Hijxtahnd ja'a Dios jaduñ piädaac coo haxøøgjäya'ayhajxy nägøxiä yajcumädowa'añii. <sup>7-8</sup>Mänaa Dios ja'a jecyquiajpt jaduñ yajcuhdägoyyän, jagooyä tul'jäya'ay yajtsoocä, ja'a hänäjty xøhjäpä Lot. Paadiä Lot yajtsoocä, je'eguiøxpä coo hänäjty hoy jiäya'ayhaty. Mänitä Dios ja'a Lot yhawaanä coogä quiajpt hänäjty quiuhdägoyya'añ. Paadiä Lot jim chohñ. Jaanč tehñ jiootmayhjäpä Lot hänäjty jaduñ coo cu'ughajxy hänäjty haxøøg jiatcø'øy jabom-jabom hijxwiinduum. <sup>9</sup>Nebiä Dios ja'a Lot jecy yajtsooquiän, jaanä jaduñä Dios ja'a quiu'ug yajtso'ogaambä coo hajxy hänäjty chaačhpøcy. Tøyhajt jaduñ. Jaanä jaduñ tiøyhájtabä coo Dios yajcopcø'øy nebiatiä haxøøgjäya'ayhajxy jiatcø'øyän. Jéquiänä Dios jaduñ miänaañ cooc hajxy quiumädowa'añ. Coö jaduñ yhabáadät, mänitä Dios miäna'ana'añ nebiaty hajxy jii chaačhtiuna'añii. <sup>10</sup>Nägø'ø nädequiä Dios yajcumädowa'añ pøn yajnahixøøby høhnda'agymiädia'agyhaam, pønä Diosmäjaa xøøghajp. Jaanč tehñ chähdiuhndägoy hajxy ñibiäda'agyii, ja'a høhnda'agymiädia'agy hajxy mäwädiipä. Jootmøj hajxy

jaduñ ñibiäda'agyii. Cab hajxy pøn wyiingudsähgø'øy. Haa jaaya'ayhajxy mõjtuungmøødpä maa Diosmädia'agy myíñänä, wiingapxpéjtäp hajxy je'ebä. <sup>11</sup>Haa ja'a Diosmoonsähajxy jim hijpä tsajpootypä, maas mõcmäjaa hajxy miøødä quejee ja'a høhnda'agymiädia'agy hajxy mäwädiipä. Pero cabä Diosmoonsä ja'a mõjtuungmøødpä hajxy wyiingapxpety maa Dioswiinduumän; ni cab hajxy ñähojy.

<sup>12</sup>Jaduñä høhndaacpähajxy ñibiäda'agyii nebiä yuughanimalän coo hajxy tii quia'a wiinjuø'owa'añ ja'a Dioscøxpä. Hiç, cabä yuughanimalhajxy tii wyiinjuø'øy ja'a Dioscøxpä. Mädyiijatiä høhndaacpähajxy quia'a wiinjuøøby, je'e hajxy ñäxiicpyy. Paquiä hajxy yajcuhdägoyya'añii nebiä animalhajxy paquiä quiuhdägoyyän coo hajxy yagho'ogyii. <sup>13</sup>Tsaächtiuánäbä høhndaacpähajxy jaduñ je'eguiøxpä coo hajxy hänäjty tøø miädsaačhtiunñ. Xoondaacp hajxy jaduñ coo hajxy cøxypänejpiä jiatcø'øy xøømbaady. Høxtä jiiiby hajxy yajtägø'øy maa mijts naxxy mgaamiuquiän ja'a Jesucristocøxpä. Ja'a Jesucristo miädiä'aguiäc tyjy hajxy pianøcxäp. Pero haxøøgjaty hajxy wyi'i jiatcø'øy mijts mwiinduum maa hajxy hänäjty mgaamiuquiän. Høxtä jiiibypiaady hajxy je'e yhøhndaacpä.

<sup>14</sup>Homiädyii to'oxiøjcä hajxy jaduñ yhiçy, yhadsojpy hajxy jaduñ. Homiänaajä hajxy jaduñ haxøøg jiatcø'owa'añ. Wyiinhøhmby

hajxy pønjatiä Diosmädia'agy hoy ca'a habøjpnä. Hadsojwiinmahñdy hajxy nã'ägä yajtuumbÿ. Tsipecøxp hajxy jaduñ nã'ägä cumädowa'añ. <sup>15</sup>Tøø tødiu'u hajxy jiojwa'açh. Tøø hajxy jaduñ tiu'udägoy. Ja'a Balaam hajxy jaduñ piahijxyp, ja'a Beor yhuung. Jeguiajtiä Balaam hänajty quiudiuna'añ ja'a quia'awiindøguiøxpä møødä xädø'øñguiøxpä. <sup>16</sup>Mänitä Balaam wyiinhøjnajxä tiic jaduñ coo jiatcø'owa'añ. Ja'a mõjc burra jaduñ mähoj. Jaduñ quiapxy nebiä jäya'ayän. Mänitä Balaam ñajuøøñä coo jaduñ quia'a hoyyä. Jaduñä burra miädia'agy miäbøjçäxä.

<sup>17</sup>Yø'ø häna'cä hønnda'agymiädia'agy hajxy mäwädijpä, jaduñ mäwiin hajxy miäbaady nebiä nøøjut tøø tiø'øçhpän. Jaduñ mäwiin hajxy miäbaatpä nebiä joc piojwäditypän coo hänajty quia'a näl'ägä tu'uy. Hiç, cabä tøyhajt hajxy nã'ä yajnähiçø'ø. Cøjxta'axiøø hajxy jiiby yhida'añ maa haxøøgtuumän. Ja'a Dios jaduñ mänaa cooc hajxy jiiby yhida'añ. <sup>18</sup>Yoñ hajxy jia mädia'agy. Ja wi'i yajcumayaamb hajxy jaduñ. Pero cabä miädia'agy hajxy choobaady. Ja'a hønnda'agymiädia'agyhaam hajxy wyiinhøøñ pønjatiä Diosmädia'agy naamdägø'ø habøjp. Jøjcapxøøyyäp hajxy jaduñmä, ween hajxy haxøøg jiatcøøguiumbä neby hajxy hijty jiatcø'øyän. <sup>19</sup>Jaduñä hønndaacpähajxy yajnähiçø'ø cooc tyijy quia'a nejpiä coo haxøøg mjäya'ayhädat. Hiç, jaduñ hajxy yajnähiçøøbiä

cooc tyijy ja'a Dios hajxy xquia'a hanéhmänä coo jecymiädia'agy hajxy ngudiúunämät, jaduñ jia mänaambä cooc hajxy hoy njäya'ayhäjtämät. Jaduñ hajxy yhønndaacpä cooc tyijy hajxy jaduhyä nnähwáatsäm. Ni je'e hajxy tøø quia'a nähwa'açh je'eguiøxpä coo yhaxøøgwiinmahñdy hajxy tøø quia'a najtshixø'ø. Paady hajxy nøcxy quiuhdägoyyaannä. Jaanä jaduñ højtshäjtämbä, coo nhaxøøgwiinmahñdy hajxy nga'a najtshixøøyyämät, jaduñ højts nøcxy nguhdägoyyaanämbä. <sup>20</sup>Coo Jesucristo hajxy njøjpøgøøyyäm, ja'a hajxy nWiindsønhäjtämbä, paadiä nhaxøøgwiinmahñdy hajxy xyajnähwáatsäm, neby hajxy yaa nmøødhäjtäm hädaa yaabä naaxwiin. Pero, coo Jesucristo miädia'agy mjahdiägøoyyät, y coo mhaxøøgwiinmahñdy jadähooc mbadu'ubøgät, maas haxøøg jadähooc mjada'añ. <sup>21</sup>Hiç, pønjatiä Diosmädia'agy jaduñ jahdiägooby, maas hoy haxøpy coo hajxy cu quia'a mäbøjcy. Hiç, coo hajxy jaduñ yhøxhíçät, maas hanaxiä hajxy jaduñ quiumädowa'añ. <sup>22</sup>Jaduñ hajxy jiädät nebiä hädaa mädia'agy miäna'añän: “Ja'a huc-hajxy, coo hajxy yhøøçh, ja'a yhamdsoo høøçh hajxy ñäwiimbijpy, nøcxy hajxy jadähooc jioø'xø'øgy. Jaanä jaduñä hädsømhajxy jiatcøøbiä, naamnä hajxy hänajty tøø chi'iy, mänit hajxy jadähooc nøcxy yajtsnä tiø'pnä mo'ondsooty.” Tøyhajt jaduñ.

**3** <sup>1-2</sup>Mägu'ughajpädøjc, miämetsc-hoocpä mijts

cham nnäjaayø'oy. Jaduhñ  
 mijts cham miämetsc-hoocpä  
 nmägapxy nhane'emy coo  
 mädia'agy hajxy mjahmiejstá'agät,  
 ja'a Diosquexypähajxy jecy  
 quiujáhyyäbä. Jaduhñä  
 howyiinmahñdy hajxy  
 mmøødhädät. Huuc jahmiets hajxy  
 jaduhmbä nebiatiä Jesucristo hajxy  
 xmiägapx xyhanéhñäm. Jaaya'ay  
 hajxy tøø xñähho'túutäm, paady  
 hajxy nWiindsøn'hájtäm. Ja'a  
 Jesucristo quiugapxyhajxy, je'e  
 mijts tøø xyhawaañä nebiatiä  
 Jesucristo hajxy tøø xmiägapxy tøø  
 xyhane'emy.

<sup>3</sup>Naxy hädaa mädia'agy hajxy  
 mdehm wyiinjuø'øwät nébiøch  
 cham nmädia'aguiän. Coo  
 naaxwiimbä hñajty wyiimbida'añ,  
 mänitä jäya'ayhajxy quiähxø'oga'añ  
 coo Dios hajxy ñänøma'añ. Haxøøg  
 hajxy jiatcø'øwa'añ nebiatiä  
 yhamdsoo joot hajxy hñajty  
 chocy, neby hajxy hñajty ñä'ägä  
 cuhdujthatiän. Xñäxi'igaamb  
 mijts jaduhñ. <sup>4</sup>Jaduhñ hajxy  
 miäna'ana'añ: “Cab jaduhñ  
 tiehñ tiøjiada'añ coo Jesucristo  
 wyiimbijtagatsa'añ neby jaduhñ  
 tøø yhuuc mänaambä. Hix, caj tii  
 mänaa tiägach. Je'enä cøxiä wiinä  
 jaduhñ yhityñä mänaa naaxwiimbä  
 jecy yhawijy tiø'xta'aguiän, mänaa  
 jecyjiäya'ayhajxy yho'oguiän”, nøm  
 hajxy yhøhnda'aga'añ. <sup>5</sup>Pero tøyhajt  
 jaduhñ coo naaxwiimbä jiaanč  
 tägach. Pero ja'a høhndaacpähajxy,  
 cabä tøyhajt hajxy wyiinjuø'øwa'añ.  
 Hix, haagä nøø hijty jegyhajty.  
 Mänitä Dios ja'a tsajt jecy  
 yhädiuun møødä naaxwiin. Jiibiä  
 naaxwiimbä yajcojy nøøjooty.

Mänit hoy piäda'agy nøøhagujc.  
<sup>6</sup>Mänitä Dios nøøgomdägoy cujecy  
 quiejxy. Mänitä naaxwiimbä  
 quiuhdägooyy. Cøjxä jäya'ayhajxy  
 yho'ogy. <sup>7</sup>Ja'a tsajt møød hädaa  
 yaabä naaxwiin, tøø Dios jaduhñ  
 yajnähdiijy coo quiøxy toya'añ.  
 Mänitäc jaduhñ tioya'añ coo Dios  
 ja'a jäya'ay yajcuhdägoyya'añ, ja'a  
 Diosmädia'agy hajxy ca'a mäbøjpa.  
<sup>8</sup>Mägu'ughajpädøjc, tsøc hajxy  
 jahmiéjtsäm coo Dios tu'xøø  
 jaduhñ ñänømy jadu'miljomøjtpä; y  
 jadu'miljomøjtpä, tu'xøøyyä jaduhñ  
 ñänømy. <sup>9</sup>Näje'e jäya'ayhajxy  
 miäna'añ cooc tyijy ja'a  
 Jesucristo quia'a tsoj yajtøjiada'añ  
 coo yaa quiädaactägatsa'añ,  
 coo haxøøgjäya'ayhajxy  
 yajcumädowa'añii. Pero cab  
 jaduhñ tiøyyä neby hajxy  
 jaduhñ jia wi'i yhøhnda'agy.  
 Hix, mee'xtujpä Jesucristo ja'a  
 mijtscøxpä. Cabä jioot chocy coo  
 pøn quiuhdägøyyät. Jaduhñä jioot  
 jia tsoy coo haxøøgcuhdujt hajxy  
 nnajtsnixøøyyämät.

<sup>10</sup>Jaguiapxy yhabaada'añ coo  
 Jesucristo yaa quiädaactägatsa'añ,  
 coo haxøøgjäya'ayhajxy  
 yajcumädowa'añii. Cabä pøn  
 jaduhñ ñajuø'oy mänaa jaduhñ  
 jiaanč habaada'añ. Mänitä  
 tsajt quiuhdägoyya'añ. Jaduhñ  
 yajmädowa'añ nebiä hänee møc  
 ya'axiän. Cøxaambä xøø tioya'añ,  
 møødä po'o, møødä mads'a,  
 møødä naaxwiimbä, møødä tijaty  
 yaa hijp hädaa yaabä naaxwiin.

<sup>11</sup>Coo cøxiä wiinä jaduhñ  
 quiuhdägoyya'añ, paady hajxy tsøc  
 hoy jäya'ayhájtäm. Tsøcxä Dios  
 hajxy hoy wiingudsähgøøyyäm.

Tsøcxä Diosmädia'agy hajxy hoy cudiúunäm. <sup>12</sup>Tsøc hajxy jøbhíjxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødä xøø, møødä po'o, møødä madsa'a, møødä naaxwiimbä. Tsøgä jäya'ayä Diosmädia'agy hajxy yajmøødmädiáacäm nämay, ween hajxy miäböcy; jaduñä Dios paquiä yaghabáadät. <sup>13</sup>Tøø Dios jaduñ miäna'añ coogä hawiinjemyčhajt yhädiuna'añ, møødä hawiinjemyñaaxwiin. Jimä njoot hajxy nbädáacäm coo Dios hajxy jim xyajncxáanäm. Cabä haxøøgpä jaduñ jim mänaa tiägø'owa'añ maa ja'a hawiinjemybiä tsajtän, ni jim maa hawiinjemybiä naaxwiimbän.

<sup>14</sup>Mägu'ughajpädøjc, tøyhajt jaduñ coo Dios hajxy jim xpiäda'agáanäm, paadiä haxøøgpä hajxy tsøc najtshixøyyäm hamuumdu'joot; jaduñä Jesucristo hajxy xpiáatämät coo pojpä cädieey hajxy hänäjty nga'a møødhájtäm, coo yaa quiädaactägätsät. Tsøc hajxy jootcujc nimiøødhíjtäm nebiä tu'ugpuhya'ay nebiä tu'ugpuhdo'oxypän. Jaduñä Dios hajxy hoy xyhíjxämät coo hajxy hänäjty hoy ndúunäm.

<sup>15</sup>Mjahmiédsäp hädaa mädia'agy hajxy jaduñ. Paadiä Jesucristo jaduñ miee'xtucy, weenä jäya'ayhajxy may miäböcy, ween hajxy jaduñ may ñähwa'ačh.

Ja'a mägu'ughajpä Pablo, jaduñ mijts tøø xñäjaayøøbiä. Ja'a Dios ja'a tøyhajt najtscapxøøyyä. Ja'a tsipjatypä ja'a Dios ja'a Pablo yajwiinjuøyy. Jadúñhøčhä Pablo njuø'oy nébiøčhä nhamdsoo puhya'ayän. <sup>16</sup>Naaghooc mijtsä Pablo xñäjaayø'oy, jaduñ ñä'ägä mädia'agyhaty nébiøch cham njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajnähixøøyyä. Cab hajxy jaduñ yajnähixø'oy nebiä Pablo jia mänaañän. Wiingatiä Diosmädia'agy hajxy yajnähixø'oy. Cabä tøyhajtpä hajxy miäböga'añ. Paady hajxy quiuhdägoyya'añ.

<sup>17</sup>Mägu'ughajpädøjc, mnä'ägä najuøøby hajxy jaduñ coo høñndaacpähajxy jii wiädita'añ. Cabä tøyhajt hajxy chocy. Haxøøg hajxy jiaanč tehñ jäya'ayhaty. Mnigwieendähadøøjäp hajxy; jaduñä tøyhajt hajxy mga'a najtshixø'owät. Cab hajxy myajwiinhøønät coo hajxy jaduñ mnä'ä tu'udägóyyät. <sup>18</sup>Jaac habøcxä hajxy jaduñ ja'a Jesucristocøxpä, ja'a hajxy nWiindsøñhájtämbä. Jaaya'ay hajxy xñähho'túutäm. Tehngajnä miädia'agy hajxy mmäböjçät; jaduñä mayhajt mõj may tiúnät ja'a mijtscøxpä. Tsøc hajxy homiänaajä capxpátäm mõj jaanč. Tsøc hajxy tehngajnä wiingudsähgøøyyäm. Amén.